

दिनांक 25.05.2022

समय 18.45 बजे

- केन्द्र चीनी री घरेलू उपलब्धता अर कीमतां माथे काबू राखण सारु शक्कर रा निर्यात रो नियमन करण रो फैसलो कीनो।
- केन्द्रीय ऊर्जा मंत्री आर. के. सिंह मुख्यमंत्रियां अर उपराज्यपालां ने ऊर्जा संरक्षण सारु संचालन समिति बणावण बाबत् कह्यो।
- लोक सभा अध्यक्ष ओम बिरला कह्यो – नौजवानां री ऊर्जा अर विश्वास नुवो भारत बणावण री बुनियाद है।
- मुख्य सचिव भेड़ां रा सुव्यवस्थित निष्क्रमण सारु अहलकारां ने पुख्ता व्यवस्था तैय करण बाबत् कह्यो।
- प्रदेश मांय काल ऊं माहवारी स्वच्छता जागरूकता विशेष अभियान चलायो जावेला।

000

चीनी सीजन 2021-22 रे दौरान देश मांय शक्कर री घरेलू उपलब्धता अर कीमत मांय थरता राखण सारु केंद्र सरकार एक जून, 2022 ऊं चीनी दिसावर मांय बेचण रा नियमन रो फैसलो कीनो है। खाद्य सचिव सुधांशु पांडेय आज नई दिल्ली मांय खबरनवीसां ने आ जाणकारी दीनी। वे कह्यो कै चीनी मिलां अर निर्यातकां ने चीनी निर्यात करण सारु खाद्य अर सार्वजनिक वितरण विभाग रा संबंधित निदेशालय ऊं मंजूरी लेवणी व्हेला। खाद्य सचिव कह्यो कै शक्कर ने दिसावर मांय बेचण री हद तय करण रो फैसलो दुनिया मांय चीनी री मांग बधबा री शंका ने ध्यान राखता थकां करी ज्यो है। इण ऊं पैली केन्द्र एक करोड़ मीट्रिक टन ताई शक्कर दिसावर मांय बेचण री मंजूरी देवण रो फैसलो कीनो। विदेश व्यापार महानिदेशालय कानी ऊं जारी हुकम रे मुजब चीनी निर्यात री आ हद ई साल एक जून ऊं 31 अक्टूबर ताई लागू व्हेला।

000

केंद्र सरकार सोयाबीन अर सूरजमुखी रा काचा तेल मांय ऊं हर एक री 20 लाख मीट्रिक टन री मात्रा 2 साल री मियाद सारु सीमा शुल्क अर कृषि अवसंरचना अर विकास उपकर री शून्य दर माथे दिसावर ऊं मंगावण री मंजूरी दीनी है। आज ऊं प्रभावी व्हे रही ई छूट ऊं ग्राहकां ने साता मिलेला। वित्त मंत्रालय कानी ऊं जारी अधिसूचना रे मुजब शुल्क मुक्त आयात माली साल 2022-23 अर 2023-24 मांय लागू व्हेला। ई रियायत ऊं तेल री घरेलू कीमतां कम करण अर महंगाई माथे काबू करण मांय मदद मिलेला।

000

ऊर्जा मंत्री आर. के. सिंह मुख्यमंत्रियां अर उपराज्यपालां ने बिजली बचावण सारु राज्य स्तर री संचालन समिति बणावण बाबत् कह्यो है। अ समितियां राज्यां अर केंद्र रा राज वाळा प्रदेशां रा मुख्य सचिवां री सदारत मांय काम करेला। वे कह्यो कै कार्बन उत्सर्जन ने कम करण अर अंतरराष्ट्रीय मंचां माथे करी ज्या वायदा पूरा करण रो एकलो साधन ऊर्जा री बचत है। मंत्री आर.के. सिंह राज्यां ऊं खेती सारु डीजल रो उपयोग सीमित कर र साल 2024 ताई खेती सारु डीजल रो उपयोग लगभग बंद करण री कोशिश करण री अरज कीनी।

000

लोक सभा अध्यक्ष ओम बिरला कह्यो है के दुनिया देश रा नौजवानां ने उम्मीद सागे देख रही है अर वां री ऊर्जा अर विश्वास नुवो भारत बणावण री बुनियाद है। लोकसभा अध्यक्ष आज जयपुर मांय युवा उद्यमी संवाद कार्यक्रम मांय बोल रह्या हा। वे नौजवानां ऊं देश, संसद, समाज, सियासत अर चुनौतियां सागे आ रह्या बदलावां समेत न्यारा-नयारा मुद्दां माथे सार्थक चर्चा कीनी। बिरला कह्यो के संवाद रे दौरान नौजवानां मांय ओजू देश ने नवनिर्माण ओड़ी ले जावण वाळी सकारात्मकता अर उद्यमशीलता निजर आयी। लोकसभा अध्यक्ष कह्यो के बत्ता ऊं बत्ता नौजवानां ने राजनीति मांय आवणो चाहिजे। वे कह्यो के नौजवानां ने सियासत मांय आ र इंसानियत री सेवा करणी चाहिजे। बिरला कह्यो के सियासत जनता री सेवा करण रो जरियो है। वे कह्यो कै सियासत मांय जो लोग बिना पद लालसा रे लगातार मेहनत करे है, वां ने जनता रो प्रेम मिले है। लोकसभा स्पीकर जयपुर मांय एक और कार्यक्रम मांय कोरोना योद्धावां रो मान ई कीनो।

000

प्रदेश मांय निवेश, कारखाना लगावण अर जापानी कंपनियां ने नीमराणा मांय बेहतर सुबीता मुहैया करावण सारु जापान एक्सटर्नल ट्रेड आर्गनाइजेशन- जेट्रो अर नाइडेक कंपनी रा आला अहलकार आज जयपुर मांय अतिरिक्त मुख्य सचिव वीनू गुप्ता अर रीको रा अहलकारां सागै न्यारा-न्यारा मुद्दां माथे चर्चा कीनी। ई दौरान अतिरिक्त मुख्य सचिव वीनू गुप्ता कह्यो कै जापानी कंपनियां प्रदेश मांय निवेश बधायो है। वे आं कम्पनियां ऊं अक्टूबर मांय व्हेवण वाळी इन्वेस्ट राजस्थान समिट मांय ई मदद करण बाबत ई कह्यो।

000

आंतरिक सुरक्षा रा हलका मांय वैश्विक चुनौतियां रा संदर्भ मांय शिक्षा, प्रशिक्षण अर शोध ने बधावो देवण सारु माउंटआबू री आंतरिक सुरक्षा अकादमी अर जोधपुर रा सरदार पटेल पुलिस विश्वविद्यालय बीचे करार करी ज्यो है। राज्यपाल कलराज मिश्र री मौजूदगी मांय आज माउंटआबू मांय आंतरिक सुरक्षा अकादमी रा निदेशक अर महानिरीक्षक एम. एस. शेखावत अर सरदार पटेल पुलिस विश्वविद्यालय रा कुलपति डॉ. आलोक त्रिपाठी करार माथे सही कीनी। राज्यपाल ई करार ने खास बताता थकां कह्यो के इण ऊं देश मांय अंदरुणी हिफाजत री निजर ऊं सैद्धांतिक सागे व्यावहारिक कोशिशों मांय तेजी आवेला।
राज्यपाल आंतरिक सुरक्षा अकादमी रो दौरों कीनो। वे अकादमी रा अहलकारों सागे ई रा कामकाज रा बारा मांय जाणकारी लीनी।

000

राज्य मांय 1 जनवरी, 2004 अर ई पाछे सरकारी नौकरी लाग्या कर्मचारियों सारु जनरल प्रोविडेंट फंड (जीपीएफ) अंशदान री मासिक कटौती 1 अप्रैल 2022 ऊं सरु करण रो फैसलो करी ज्यो है। मुख्यमंत्री अशोक गहलोत ई बाबत प्रस्ताव ने मंजूरी दे दीनी है। प्रस्ताव रे मुजब अप्रैल 2022 री कटौती मई 2022 री तनखाह ऊं करी जावेला। ध्यानजोग है के मुख्यमंत्री माली साल 2022-23 रा बजट मांय 1 जनवरी, 2004 अर ई पाछे नौकरी लाग्या कर्मचारियों सारु पूर्व पेंशन योजना (ओपीएस) लागू करण रो ऐलाण कीनो हो।

000

प्रयागराज जयपुर एक्सप्रेस रेलगाड़ी अब बीकानेर ताई चालेला। आज ई गाड़ी ने सांसद राहुल कस्वां, बीकानेर री महापौर सुशीला कंवर राजपुरोहित अर डीआरएम बीकानेर ऊं हरी झंडी बता र रवाना कीनी। कार्यक्रम मांय बीकानेर रा सांसद अर केंद्रीय मंत्री अर्जुनराम मेघवाल अर बीकानेर रा विधायक अर शिक्षा मंत्री डॉ. बी. डी. कल्ला वर्चुअल तरीका ऊं जुड्या। ई मौके सांसद राहुल कस्वां कह्यो के प्रयागराज-जयपुर रेलगाड़ी ने चूरु व्हेती थकी बीकानेर ताई चलावण ऊं ई हलका री जनता रो उत्तर प्रदेश ताई जुड़ाव व्हेला। वे कह्यो के लुधियाना – सादुलपुर सवारी गाड़ी ने चूरु ताई बधायां पाछे अब रतनगढ़ ताई चलावण री कोशिश करी जा रही है। ई गाड़ी ने सीकर मांय सांसद सुमेधानंद झंडी बता र रवाना कीनी। आज चलायी ज्यी गाड़ी सप्ताह मांय 04 दिन सीकर, फतेहपुर-शेखावाटी, चूरु अर तीन दिन सीकर, झुंझुं, लोहारू, सादुलपुर, चूरु व्हेती थकी चालेला।

000

राज्य मांय सुव्यवस्थित भेड़ निष्क्रमण सारु मुख्य सचिव ऊषा शर्मा अहलकारों ने जिलां मांय पुख्ता व्यवस्था तैय करण बाबत कह्यो है। वे ई सारु अहलकारों ने मिल-जुल र काम करण रा हुकम दीना। मुख्य सचिव आज भेड़ निष्क्रमण री तैयारियों सारु व्ही मीटिंग मांय वीडियो कांफ्रेंस रे मार्फत बोल रही ही। वे कह्यो कै केई दफा भेड़ां गेला मांय आवण वाळा खेतां मांय घुस जावे है, जिण ऊं काश्तकारों अर भेड़पालकां बीचे टकराव री शंका रेहवे है। वे ऐडा हालात ऊं बचबा सारु पुलिस अर प्रशासन रा अहलकारों ने सावचेत व्हे र काम करण सारु कह्यो।

000

रणथंभौर बाघ परियोजना री खंडार रेंज मांय बाघिन टी-69 रा डोढ साल रा मादा शावक री मौत व्हे ग्यी। नियमित गश्त रे दौरान ई री लाश जंगलात महकमा रा कर्मचारियों ने गोठ बिहारी कने नीला पट्टा हलका मांय मिली। महकमा रा अहलकारों रे मुजब शावक रा शरीर माथे घाव मिल्या है। शिकार सारु दूजा बाघ सागै व्ही लड़ाई रे कारण आ मौत व्हेवण री शंका है। अहलकारों रे मुजब मौत रा कारणों रो खुलासा पोस्टमार्टम रपट आयां पाछे व्हे सकेला। 13 मई ने ई ई टाइगर रिजर्व मांय एक बाघिन री मौत व्हे ग्यी ही।

000

अंतरराष्ट्रीय माहवारी स्वच्छता दिवस 28 मई ने मनायो जावेला। ई सिलसिला मांय माहवारी रा बारा मांय महिलावां मांय जाग जगावण सारु प्रदेश मांय काल अर 27 मई ने खास अभियान चलायो जावेला। इण ऊं पैली आज जयपुर मांय ई मुद्दां माथे एक दिन री कार्यशाला राख्यी ज्यी। इण मांय महिला अर बाल विकास मंत्री ममता भूपेश माहवारी स्वच्छता प्रबंधन रा बारा मांय जागरूकता पोस्टर अर एक लघु फिल्म रो विमोचन कीनो। ई पाछे खबरनवीसां सागै बातचीत करता थकां मंत्री ममता भूपेश कह्यो कै समाज सारु माहवारी स्वच्छता जरूरी मुद्दा है। सरकार इण ई ने ध्यान राखता थकां आईएम शक्ति-उडान योजना चलायी है, ज्यीं रा तैत मुफ्त सैनेटरी नैपकिन बांट्या जा रह्या है। वे कह्यो कै ई योजना ऊं महिलावां ऊं जुडी केई बीमारियों मांय कमी आवेला।

000

प्रदेश मांय केई ठौड़ां बिरखा व्हेवण, आंधी चालण अर तेज बायरो बाजण रे कारण गर्मी रो असर कम पड्यो है। घणखर ठौड़ां पारो 40 डिग्री सैल्सियस ऊं नीचे दर्ज कर्यो जा रह्यो है। आज झालावाड़ मांय हल्की बिरखा व्ही, जद के कुछ जिलां मांय छोटो-छिडको व्ह्यो। मौसम विभाग आज अजमेर, अलवर, भरतपुर, बूंदी, बारां, कोटा, धौलपुर, करौली, टोंक अर सवाईमाधोपुर मांय तेज बायरो बाजण अर बीजळी पड़बा सारु चेतायी ज्यो है। विभाग रे मुजब कठै-कठै बिरखा व्हेवण अर तेज बायरो बाजण रो दौर आवता तीन दिन चालतो रेहवेला।

0000

बूंदी जिला रा अभयपुरा, भीमलत अर बरघा बांध हलका रा 41 गांवां रा किसानां ने फार्म पौंड अर डिग्गी बणावण अर पाइप लाईन डालबा सारू सब्सिडी दी जावेला। कृषि विस्तार रो काम देख रह्या उपनिदेशक रमेश चंद जैन बतायो कै फार्म पौंड सारू खर्चा रो 75 फीसदी या 1 लाख 12 हजार 500 रुप्या दिया जावेला। डिग्गी बणावण सारू खर्चा रो तीन चौथाई या 3 लाख रुप्या अर पाइप लाइन डालण सारू खर्चा रो 75 फीसदी या साढे 22 हजार रुप्या ताई री सब्सिडी दी जावेला।

000

बीकानेर रा संभागीय आयुक्त नीरज के. पवन स्वामी केशवानंद राजस्थान कृषि विश्वविद्यालय रा कुलपति प्रो. रक्षपाल सिंह रा कामकाज रा तरीका माथे सवाल उठाया है। वे ई बारा मांय राज्यपाल कलराज मिश्र अर कृषि विभाग रा प्रमुख शासन सचिव ने कागद लिख र नियम रे मुजब कार्रवाई करण री अरज कीनी है। संभागीय आयुक्त कागद मांय मांड्यो कै विश्वविद्यालय मांय अतिरिक्त कुल सचिव रो कोई ओहदो मंजूर नी है जदके ई री भर्ती रो विज्ञापन जारी कर र भर्ती री कार्यवाही करी जा रही है।

0000

झालावाड़ जिला रा झालरापाटन रा पुलिस ट्रेनिंग स्कूल मांय आज 15 वों दीक्षांत परेड समारोह राख्यी ज्यो। इण मांय 432 प्रशिक्षु जवानां ने पुलिस सेवावां ने निष्ठा ऊं निभावण री शपथ दिरायी ज्यी। ई दौरान प्रशिक्षु जवान परेड बैंड वादन अर हथियारां ने जोड़ण अर चलावण रो प्रदर्शन कीनो। कार्यक्रम मांय एडीजी संजीब नार्जरी बेहतरिन प्रदर्शन करण वाळा जवानां ने मान पाना दे र नवाजा।

000